

ODLUKA O VISINI KOMUNALNIH TAKSI OPĆINE NOVO SARAJEVO*

(„Službene novine KS”, broj 17/22)

POGLAVLJE I - OPĆE ODREDBE

Član 1.

(Predmet)

Ovom Odlukom propisuje se visina i vrsta komunalnih taksi (u daljem tekstu: takse) na području Općine Novo Sarajevo (u daljem tekstu: Općina) za pravna i fizička lica, u skladu sa kriterijima, načinom i rokovima, pripadnost prihoda od takse, oslobađanje od plaćanja, otpis takse, prijava i naplata takse kao i ostala pitanja kojima se reguliše ova oblast, u skladu sa Zakonom o komunalnim taksama („Službene novine Kantona Sarajevo”, br. 8/22) (u daljem tekstu: Zakon).

Član 2.

(Definiranje pojmova)

(1) U smislu ove Odluke:

a) istaknuta firma podrazumijeva naziv pod kojim posluje pravno ili fizičko lice i ista je postavljena kao označavanje sjedišta odnosno poslovne jedinice na mjestu poslovanja, a kojim se jasno identificira pravno/fizičko lice koje na tom mjestu obavlja djelatnost odnosno zanimanje;

b) sredstava za igru i igre na sreću podrazumijeva svaki uređaj kojim se naplaćuje provedeno vrijeme jednog ili više konzumenata takvih uređaja (bilijar, fliperi, video igre, pikado, aparati/automati za posebne igre na sreću i sl.);

c) poslovni prostor u kojem se priređuju klasične igre na sreću i posebne igre na sreću podrazumijeva svaki prostor u kojem se priređuju klasične igre na sreću i/ili posebne igre na sreću definisane odredbama Zakona o igrama na sreću („Službene novine Federacije BiH”, br. 48/15 i 60/15) sa eventualnim izmjenama i dopunama;

d) držanje i izvođenje muzike uživo u ugostiteljskim objektima podrazumijeva povremeno ili svakodnevno izvođenje muzičkog programa uz pružanje ugostiteljskih usluga;

e) isticanje objava, oglasa i saopćenja podrazumijeva postavljanje stalnih ili privremenih banera, plakata, panoa, na javnim mjestima u štampanoj ili elektronskoj formi, što podrazumijeva i reklamiranje brendova, proizvoda ili usluga koje pružaju pravne ili fizičke osobe ili koje imaju svrhu putokaza prema mjestu sjedišta sponzora koji ih je postavio;

f) svako korištenje prostora na javnim mjestima za kampove (šatore, prikolice i motorna vozila svih kategorija) podrazumijeva zauzimanje prostora za privremeni boravak od strane jedne ili više osoba;

g) postavljanje uređaja za isplatu i naplatu gotovine (bankomata), podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;

h) postavljanje drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.) podrazumijeva se postavljanje navedenih uređaja koji automatskom obradom podataka obračunavaju i naplaćuju razne vrste usluga bez osobnog posredovanja konzumenta sa pružaocem usluga koji može biti registriran kao fizička ili pravna osoba.

Član 3.

(Osnov za plaćanje takse)

(1) Na teritoriji Općine Novo Sarajevo taksa se iskazuje i naplaćuje za:

a) svaku istaknutu firmu;

b) držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću);

c) poslovni prostor u kojem se priređuju klasične igre na sreću i posebne igre na sreću koje su definirane odredbama Zakona o igrama na sreću („Službene novine Federacije BiH”, br. 48/15 i 60/15) i njegovim eventualnim izmjenama i dopunama;

d) držanje i izvođenje muzike uživo u ugostiteljskim objektima;

e) isticanje objava, oglasa i saopćenja na javnim mjestima;

* Odluka je objavljena u „Službenim novinama KS”, broj 17/22 od 28. aprila 2022. godine, a stupila je na snagu 29. aprila 2022. godine. Odluka je donijeta na osnovu člana 6. Zakona o komunalnim taksama („Službene novine Kantona Sarajevo”, broj 8/22).

- f) korištenje prostora na javnim mjestima za kampove (šatore, prikolice i motorna vozila svih kategorija);
- g) postavljanje uređaja za isplatu i naplatu gotovine (bankomata) i
- h) postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

(2) Izuzetno od stava (1) tačke a) ovog člana taksa se ne plaća za istaknutu firmu čija tabla ne prelazi dimenzije 200x300 milimetara.

Član 4.

(Početak nastanka obaveze)

(1) Taksena obaveza iz člana 3. stav (1) tačka a) ove Odluke nastaje danom donošenja rješenja o registraciji pravnog lica, odnosno rješenja kojim se odobrava obavljanje djelatnosti za fizička lica.

(2) Taksena obaveza iz člana 3. stav (1) tačke od b) do h) ove Odluke nastaje u trenutku kada se počne koristiti predmet, usluga ili pravo za čije je korištenje propisano plaćanje komunalne takse.

Član 5.

(Obveznici plaćanja takse)

(1) Takseni obveznici su sva pravna i fizička lica registrirana za obavljanje djelatnosti koje posluju na području Općine Novo Sarajevo, imaju istaknutu firmu, oznaku, obilježje ili natpis odnosno lica koja u okviru svoje djelatnosti koriste predmet ili prostor za čije korištenje je propisano plaćanje takse.

(2) Ako za istu taksu postoje dva ili više obveznika, njihova obaveza je solidarna.

Član 6.

(Isticanje firme)

(1) Pravna i fizička lica koja obavljaju privrednu djelatnost na osnovu odobrenja nadležnog organa, dužni su na ulazu u poslovno-proizvodni prostor ili na ulazu u poslovni prostor ili na ulazu u poslovni prostor gdje obavljaju poslovnu djelatnost istaknuti naziv firme.

(2) Pod nazivom firme se podrazumijeva:

a) naziv firme pod kojim je takseni obveznik registriran kod nadležnog organa odnosno naziv poslovne jedinice kada se firma ističe na poslovnoj jedinici;

b) sjedište lica i identifikacioni broj;

c) oznaka, obilježje ili natpis na radnim ili drugim prostorijama, na fasadi građevine u kojoj se nalaze radne prostorije ili van gabarita te građevine, na ulaznim vratima, izlozima-portalima ili unutar izloga radnih prostorija, kojim se označava da određeno pravno ili fizičko lice obavlja određenu djelatnost ili zanimanje.

(3) Ako su, na radnim i drugim prostorijama, na fasadi građevine u kojoj se nalaze radne i druge prostorije ili van gabarita te građevine, istaknuta dva istovjetna imena, istaknutom firmom se smatra samo jedan naziv a sve ostalo je u tretmanu reklame.

(4) Firma se mora istaknuti najkasnije danom početka obavljanja djelatnosti.

Član 7.

(Rokovi podnošenja taksene prijave)

(1) Prijavu za razrez komunalne takse porezni obveznik je dužan podnijeti Poreznoj upravi Federacije BiH, Kantonalni porezni ured Sarajevo - Porezna ispostava Novo Sarajevo (u daljem tekstu: Porezna uprava) do kraja februara tekuće godine, prema stanju na dan 01. januara tekuće godine za koju se razrez vrši, odnosno u roku od 15 dana od dana donošenja rješenja o registraciji pravnog lica, odnosno rješenja kojim se odobrava obavljanje djelatnosti za fizička lica, ukoliko je porezni obveznik registrovao djelatnost u toku poslovne godine. Obveznik komunalne takse dužan je Poreznoj upravi podnijeti prijavu za komunalnu taksu elektronski ili putem propisanog obrasca.

(2) Izuzetno od stava (1) ovog člana prijava za razrez takse iz člana 3. ove Odluke za 2022.g. podnosi se do kraja aprila 2022. godine, a prema stanju na dan 01. januar 2022. godine.

(3) Promjene nastale poslije prvog januara tekuće godine, odnosno u toku godine a za čiju je upotrebu propisana taksa, takseni obveznik je dužan prijaviti Poreznoj upravi najkasnije u roku od 15 dana od dana nastanka promjene.

(4) Takseni obveznici iz člana 3. stav (1) tačke d), e), f), g), h), ove Odluke dužni su najkasnije tri dana prije početka organiziranja muzike uživo, isticanja objava, oglasa i saopćenja, korištenja prostora na javnim mjestima, postavljanja uređaja za naplatu gotovine kao i svih drugih uređaja koji putem automatske obrade podataka naplaćuju/isplaćuju usluge gotovinom, karticama za naplatu ili posredstvom telekom operatera prijaviti Poreznoj upravi dan početka i dan završetka organiziranja muzike uživo, isticanja objava, oglasa i saopćenja, korištenja prostora na javnim mjestima postavljanja uređaja za naplatu gotovine kao i svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera.

(5) Takseni obveznik iz člana 3. stav (2) ove Odluke dužan je Poreznoj upravi podnijeti Prijavu komunalne takse, u rokovima propisanim stavom (1) ovog člana, u kojoj će označiti oslobađanje po osnovu istaknute firme na tabli koja ne prelazi dimenzije 200x300 milimetara.

(6) Ukoliko takсени obveznik u propisanom roku ne podnese prijavu, prijavu takse će u ime obveznika izvršiti Porezna uprava po isteku 15 dana od kada je poreznom obvezniku istekao rok za podnošenje prijave, a u skladu sa odredbama Zakona o Poreznoj upravi Federacije BiH i podzakonskim aktima.

(7) Ukoliko takсени obveznik na prijavi dostavi netačne podatke, odnosno otkrije da je napravljena greška ili propust, izmijenjena prijava se podnosi odmah a najkasnije u roku od petnaest (15) dana od dana kada porezni obveznik otkrije da se moraju izmijeniti podaci na prijavi koja je ranije podnesena, a naročito ako se otkrije da iznos porezne obaveze iskazan u poreznoj obavezi nije tačan. Porezna uprava ima ovlaštenje, u skladu sa Zakonom o poreznoj upravi Federacije BiH i podzakonskim aktima, izmijeniti poreznu prijavu podnesenu od poreznog obveznika ukoliko utvrdi da porezna prijava nije ispravno podnesena ili ne sadrži tačne podatke.

Član 8.

(Obračun i način plaćanja)

(1) Taksa iz člana 3. ove Odluke se obračunava i plaća:

a) za tačku a) – jednom u toku kalendarske godine u roku od petnaest dana po isteku roka za prijavljivanje takse;

b) za tačke b) i c) – jednom u toku kalendarske godine, po jednom sredstvu za omogućavanje igara i za jedan prostor, u roku od petnaest dana po isteku roka za prijavljivanje takse;

c) tačke d), e), f), g) i h) – do 05. tog u mjesecu za prethodni mjesec.

Član 9.

(Otpis takse)

(1) U slučaju smrti taksenog obveznika fizičkog lica i trajnog prestanka obavljanja registrovane djelatnosti iza kojeg nije ostala pokretna i nepokretna imovina iz koje bi se mogla naplatiti taksa, Općinsko vijeće na prijedlog općinskog načelnika otpisuje taksu.

(2) Zahtjev za otpis takse Općini podnosi pravni sljednik/nasljednik taksenog obveznika ili Porezna uprava.

(3) Jedan primjerak akta kojim se otpisuje taksa u slučaju iz stava (1) ovog člana dostavlja se Poreznoj upravi.

POGLAVLJE II – TARIFNI SISTEM

Odjeljak A – Zone poslovanja i visina komunalne takse

Član 10.

(Zone poslovanja)

Općina Novo Sarajevo odredila je četiri zone kao početni kriterij određivanja visine komunalne takse na istaknutu firmu. Zone čine svi brojevi ulica, osim kada u tekstu nije drugačije navedeno.

1) I zonu čine ulice: Azize Šaćirbegović, Behdžeta Mutevelića, Bulevar Meše Selimovića, Envera Šehovića, Džemala Bijedića, Fra Filipa Lastrića, Grbavička, Hamdije Čemerlića, Kolodvorska, Ložionička, Malta, Marka Marulića, Put života, Topal Osman Paše, Zagrebačka, Vilsonovo šetalište i Zmaja od Bosne.

2) II zonu čine ulice: Aleja lipa, Bihačka, Dr. Fetaha Bećirbegovića, Derviša Numića, Drinska, Ferde Hauptmana, Džamijska, Hasana Brkića, Hercegovačka, Humska do broja 145 odnosno 320, Muhameda Ridžanovića, Put mladih muslimana, Porodice Ribar, Šibenska, Trg heroja, Trnovska, Džavida Haverića, Emerika Bluma, Paromlinska, Ljubljanska, Nedima Filipovića, Pofalička, Zvornička, Kemala Kapetanovića, Krivajska.

3) III zonu čine ulice: Alojza Benca, Ante Fjamenga, Avde Smajlovića, Banjalučka, Blagajska, Bledska, Bugojanska, Čamila Sijarića, Dobojska, Hrasnička, Fojnička, Goraždanska, Gornji Velešići, Igmanska, Ivana Gorana Kovačića, Ivanjska, Kupreška, Kalesijska, Mustafe Behmena, Muhameda ef. Pandže, Milinkladska, Novopazarska, Nevesinjska, Ohridska, Olovska, Orašačka, Pavla Lukača, Posavska, Saliha Udžvarlića, Splitska, Sprečanska, Srebrenička, Šaćira Sikirića, Trebevička, Triglavska, Velešićka, Varažinska, Neretvanjska, Butirska, Sakiba Nišića, Fra Matije Divkovića, Radnička, Ruđera Boškovića, Zenička.

4) IV zonu čine ulice: Alije Kučukalića, Bjelopoljska, Gornjovakufska, Hamida Hadžibegića, Hum brdo, Humska od broja 147 odnosno 322, Husinjska, Isaka Samokovlije, Petra Sinana Šaina, Počiteljska, Prozorska, Reisa Fehima Spahe, Reisa Fehima Spahe čikma, Samoborska, Sandžačka, Skopljanska, Teočaka, Travnička, Višoka, Vrbaska, Zahira Panjete, Dolina mira, 10. maja, Kanara, Mahmuta Mahmutovića, te ostale ulice koje nisu obuhvaćene gore navedenim zonama.

Član 11.

(Visina komunalne takse)

(1) Za svaku istaknutu firmu, oznaku, obilježje ili natpis na poslovnim i drugim prostorijama, objektima i mjestima kojim se označava da određeno pravno ili fizičko lice obavlja određenu djelatnost ili zanimanje, utvrđuje se godišnja taksa. Visina komunalne takse određuje se tarifnim brojem u odnosu na zonu u kojoj se pravno ili fizičko lice nalazi.

(2) Ako se obveznik takse nalazi na granici poslovnih zona, taksa na istaknutu firmu se plaća prema zoni kojoj pripada ulica na kojoj je istaknuta firma.

(3) Taksa se obračunava po pojedinačnim tarifnim brojevima i predstavlja zbir utvrđene obaveze.

Odjeljak B – Tarifni brojevi

Član 12.

(Tarifni broj 1)

(1) Obveznik plaćanja takse je svako pravno ili fizičko lice (registrirano u nadležnoj općinskoj službi, kod nadležnog ministarstva ili nadležnog suda), koje ima istaknutu firmu, oznaku, obilježje ili natpis na poslovnim prostorijama i objektima kojim se označava da ista obavljaju djelatnost ili zanimanje u skladu sa pozitivnim zakonskim propisima.

(2) Za fizička lica koja obavljaju obrtničku djelatnost ili zanimanje, a koja su registrirana u nadležnoj općinskoj službi ili kod nadležnog ministarstva, za svaku istaknutu firmu, oznaku, obilježje ili natpis na poslovnim prostorijama i objektima, obračunava se i naplaćuje godišnja taksa u iznosu 300 KM.

(3) Pravne osobe za svaku istaknutu firmu, oznaku, obilježje ili natpis na poslovnim prostorijama i objektima, kojima se označava da određena pravna osoba obavlja izvjesnu privrednu djelatnost ili zanimanje obračunava se i naplaćuje godišnja taksa. Razvrstavanje pravnih osoba vrši se na osnovu načina poslovanja, odnosno da li pravno lice na području Općine posluje kao sjedište ili podružnica/poslovna jedinica/filijala. Ukoliko pravno lice ima sjedište na području Općine, razrez će se izvršiti u skladu sa sljedećom tarifom:

Red. br.	Razvrstavanje pravnih lica	ZONE (iznosi izraženi u KM)			
		I	II	III	IV
1.	MIKRO	500,00 KM	450,00 KM	400,00 KM	350,00 KM
2.	MALO	2.000,00 KM	1.800,00 KM	1.700,00 KM	1.600,00 KM
3.	SREDNJE	4.000,00 KM	3.800,00 KM	3.700,00 KM	3.500,00 KM
4.	VELIKO	8.000,00 KM	7.800,00 KM	7.700,00 KM	7.500,00 KM

(4) Pravna lica koja su u skladu sa Zakonom o računovodstvu i reviziji Federacije BiH ("Službene novine Federacije BiH", broj 15/21) razvrstana u srednje i velike poslovne subjekte a koji na području Općine imaju pored sjedišta otvorene i poslovne jedinice, plaćaju za svaku poslovnu jedinicu taksu u iznosu od 40% razrezane takse sjedišta prema zoni gdje se poslovna jedinica nalazi.

(5) Pravna lica koja su u skladu sa Zakonom o računovodstvu i reviziji Federacije BiH ("Službene novine Federacije BiH", broj 15/21) razvrstana u mikro i male poslovne subjekte a koji na području Općine imaju pored sjedišta otvorene poslovne jedinice, plaćaju za svaku poslovnu jedinicu taksu u iznosu od 20% razrezane takse sjedišta, prema zoni gdje se poslovna jedinica nalazi.

(6) Pravna lica koja na području Općine imaju registrovane samo poslovne jedinice plaćaju iznos takse utvrđen stavom (3) ovog člana za prvu poslovnu jedinicu. Za svaku narednu, plaćanje se vrši u iznosu od 40% razrezane takse poslovne jedinice u slučaju srednjih i velikih preduzeća, odnosno u iznosu od 20% za lica svrstana u mikro i mala preduzeća.

Član 13.

(Tarifni broj 2)

(1) Tarifni broj 2 utvrđuje se:

a) za držanje sredstava za igru (bilijari, automati, fliperi, video igre, pikado i sl.) odnosno gdje se dobitak mjeri isključivo u određenom broju igara, plaća se komunalna taksa godišnje po jednom sredstvu u iznosu od 400 KM;

b) za držanje sredstava za igre na sreću koje donose novac (elektronski ili mehanički ili slični aparati koji tokom igre omogućuju igraču dobitak u novcu ili nekom drugom obliku prava na novac - žetoni i sl.) plaća se komunalna taksa godišnje po jednom sredstvu u iznosu od 3.000 KM;

c) za poslovni prostor u kojem se priređuju klasične (lutrijske) igre na sreću a koje su definisane odredbama Zakona o igrama na sreću ("Službene novine Federacije BiH", broj 48/15 i 60/15) i njegovim eventualnim izmjenama i dopunama plaća se godišnja taksa u iznosu od 5.000 KM;

d) za poslovni prostor u kojem se priređuju posebne igre na sreću, igre kladjenja na sportske rezultate i druge neizvjesne igre a koje su definisane odredbama Zakona o igrama na sreću ("Službene novine Federacije BiH", broj 48/15 i 60/15) i njegovim eventualnim izmjenama i dopunama, plaća se godišnja taksa u iznosu od 5.000 KM;

e) za poslovni prostor u kojem se priređuju posebne igre na sreću koje igrači igraju protiv kasina ili jedan protiv drugoga na stolovima za igru sa kuglicama, kockicama ili kartama plaća se komunalna taksa godišnje u iznosu od 5.000 KM.

(2) Za tumačenje pojmova navedenih u ovom tarifnom broju, referentni su opisi Zakona o igrama na sreću ("Službene novine Federacije BiH", broj 48/15 i 60/15).

Član 14.

(Tarifni broj 3)

Tarifni broj 3. utvrđuje se:

a) za priređivanje muzike uživo u ugostiteljskim objektima plaća se komunalna taksa dnevno u iznosu od 50 KM;

b) za priređivanje koncerata, proslava i sličnih manifestacija u zatvorenom i na otvorenom prostoru plaća se taksa u iznosu od 1 KM/m²;

Član 15.

(Tarifni broj 4)

Tarifni broj 4. utvrđuje se za postavljanje kampova na javnim mjestima (šatora, prikolica, motornih vozila svih kategorija) i drugu privremenu upotrebu plaća se dnevna taksa:

- a) za svaki šator - 2 KM,
- b) za kamp prikolicu -1 KM,
- c) za motorno vozilo - 1 KM.

Član 16.

(Tarifni broj 5)

Tarifni broj 5. utvrđuje se za postavljanje uređaja za isplatu i naplatu gotovine (bankomati i sl.) plaća se taksa godišnje po jednom uređaju u iznosu od 2.000 KM.

Član 17.

(Tarifni broj 6)

Tarifni broj 6. utvrđuje se za postavljanje uređaja koji putem automatske obrade podataka naplaćuju usluge gotovinom, karticama za naplatu, ili posredstvom telekom operatera (kafemati, parkomati i sl.) plaća se taksa godišnje po jednom uređaju u iznosu 300 KM.

Član 18.

(Tarifni broj 7)

Tarifni broj 7. utvrđuje se za isticanje objava, oglasa i saopćenja na javnim mjestima i propisuje taksu u iznosu od 2 KM dnevno, srazmjerno broju dana isticanja oglasa, a što se utvrđuje ugovorom/rješenjem.

Član 19.

(Tarifni broj 8)

Tarifni broj 8. utvrđuje se za sva pravna ili fizička lica koja nisu izričito obuhvaćena bilo kojim tarifnim brojem ove Odluke, i propisuje taksu u iznosu od 300 KM na godišnjem nivou.

POGLAVLJE III – PRAVO NA UMANJENJE, OTPIS I OSLOBAĐANJE OD TAKSE

Član 20.

(Umanjenje komunalne takse)

(1) Pravna ili fizička lica koja prvi put registriraju djelatnost na području Općine Novo Sarajevo ovom Odlukom su oslobođena plaćanja takse po Tarifnom broju 1. u visini od 50% na istaknutu firmu u prvoj godini poslovanja i to od dana donošenja rješenja o registraciji pravnog lica, odnosno rješenja kojim se odobrava obavljanje djelatnosti za fizička lica, do kraja godišnjeg obračunskog perioda.

(2) Obveznicima takse koji obavljaju djelatnost tradicionalnih i starih zanata, a koji su utvrđeni Uredbom za zaštitu tradicionalnih i starih obrta ("Službene novine Federacije BiH", br. 66/09, 38/10 i 16/12) taksa se razrezuje u iznosu od 20% odnosno 60,00 KM.

(3) Samostalnim obrtnicima koji obavljaju usluge taksi prijevoza, a koji su razvrstani u kategoriju paušalac taksa se razrezuje u iznosu 30% odnosno 90,00 KM.

(4) Samostalnim obrtnicima iz djelatnosti trgovine na malo – trgovac pojedinac, a koji su razvrstani u kategoriju paušalac taksa se razrezuje u iznosu 30% odnosno 90,00 KM.

(5) Fizička lica koja obavljaju privrednu djelatnost u pokretnim objektima – kiosci taksa se razrezuje u iznosu 50% odnosno 150,00 KM.

(6) Taksa na istaknutu firmu pravne ili fizičke osobe koja je na osnovu rješenja nadležnog organa prestala obavljati djelatnost u toku obračunskog perioda će se obračunati srazmjerno broju mjeseci i dana u kojima je lice obavljalo djelatnost.

Član 21.

(Oslobađanje od plaćanja komunalne takse)

Od plaćanja takse oslobođeni su:

- a) institucije Bosne i Hercegovine i njeni organi;
- b) organi, organizacije i javne ustanove Federacije Bosne i Hercegovine, Kantona, općina sa područja Kantona Sarajevo i Grada Sarajeva,
- c) humanitarne i dobrotvorne organizacije iz osnovne djelatnosti,
- d) udruženja i fondacije registrirane u skladu sa Zakonom o udruženjima i fondacijama BiH ("Službeni glasnik BiH", broj 32/01, 42/03, 63/08, 76/11 i 94/16), Zakonom o udruženjima i fondacijama Federacije BiH ("Službene novine Federacije BiH", broj 45/02) te crkve i vjerske zajednice registrovane u skladu sa odredbama Zakona o slobodi vjere i pravnom položaju crkava i vjerskih zajednica u BiH ("Službeni glasnik BiH", broj 5/04),

- e) vojni invalidi od plaćanja takse iz člana 3, stav (1), tačke a) i f) ove Odluke,
- f) lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, RVI i civilne žrtve rata,
- g) privredna društva za zapošljavanje lica sa invaliditetom i zaštitna radionica,
- h) pravno ili fizičko lice koje registruje djelatnost po prvi put na području Općine Novo Sarajevo, oslobođeno je plaćanja takse po Tarifnom broju 1. u visini od 50% na istaknutu firmu u prvoj godini poslovanja, i to od dana donošenja rješenja o registraciji pravnog lica, odnosno rješenja kojim se odobrava obavljanje djelatnosti za fizička lica do kraja godišnjeg obračunskog perioda.

Član 22.

(Uplata takse)

(1) Komunalne takse određene ovom Odlukom uplaćuju se na depozitni račun Općine Novo Sarajevo, šifra Općine 079, vrsta prihoda 722322 i poziv na broj 0000000000, a u skladu sa Pravilnikom o načinu uplate javnih prihoda budžeta i izvanbudžetskih fondova na teritoriji Federacije BiH.

(2) Komunalne takse su prihod Općine.

Član 23.

(Povrat više uplaćene takse)

(1) Obveznik od kojeg je taksa i kamata naplaćena, a koju nije bio dužan platiti ili je više uplatio, ima pravo na povrat više uplaćene takse.

(2) Zahtjev za povrat se podnosi Poreznoj upravi Novo Sarajevo.

(3) Porezna uprava je dužna da u roku od 20 dana odluči o zahtjevu.

POGLAVLJE IV – PRIMJENA PROPISA, NADZOR I KONTROLA

Član 24.

(Primjena zakonskih odredbi)

(1) Taksene obaveze koje su nastale do dana stupanja na snagu ove Odluke, izvršit će se u skladu sa odredbama propisa koji su važili u momentu nastanka taksene obaveze.

(2) Postupci razreza visine iznosa takse u predmetima koji nisu pravosnažno okončani do dana stupanja na snagu ove Odluke, bit će okončani prema odredbama ove Odluke.

Član 25.

(Nadzor i kontrola prijave)

(1) Nadzor i kontrolu prijave, obračuna i plaćanja općinske komunalne takse vrši Porezna uprava u saradnji Službom za privredu, budžet i finansije Općine Novo Sarajevo, u okviru pojedinačnih nadležnosti.

(2) Porezna uprava će, Službi za privredu, budžet i finansije Općine Novo Sarajevo polugodišnje dostavljati informaciju o realizaciji obaveza po osnovu komunalne takse.

Član 26.

(Nadležni organi za provođenje ove Odluke)

(1) Za provođenje ove Odluke zadužuje se Kantonalni porezni ured Sarajevo – Porezna uprava.

(2) Služba za privredu, budžet i finansije Općine Novo Sarajevo može vršiti povremene kontrole prijave i usklađenosti podataka sa Poreznom upravom, u okviru svojih nadležnosti.

POGLAVLJE V – PRELAZNE I ZAVRŠNE ODREDBE

Član 27.

(Primjena Odluke)

(1) Stupanjem na snagu ove Odluke prestaje važiti Odluka o visini komunalnih taksi Općine Novo Sarajevo ("Službene novine Kantona Sarajevo", broj 3/13 i 1/19).

(2) Za pitanja koja nisu regulisana ovom Odlukom primjenjivat će se odredbe Zakona o komunalnim taksumama Kantona Sarajevo ("Službene novine Kantona Sarajevo", broj 8/22) i Zakona o Poreznoj upravi Federacije BiH ("Službene novine Federacije BiH", br. 33/02, 28/04, 57/09, 40/10, 27/12, 07/13, 71/14 i 91/15).

Član 28.

(Gramatička terminologija)

Izrazi koji su u tekstu radi preglednosti dati u muškom i ženskom gramatičkom rodu ili samo u jednom gramatičkom rodu, odnose se bez diskriminacije na oba spola.

Član 29.

(Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".